

СТАНДАРТЧИЛАЛ, ТЕХНИКИЙН ЗОХИЦУУЛАЛТ, ТОХИРЛЫН ҮНЭЛГЭЭНИЙ ИТГЭМЖЛЭЛИЙН ТУХАЙ ХУУЛИЙН ШИНЭЧИЛСЭН НАЙРУУЛГЫН ТӨСЛИЙН ТАНИЛЦУУЛГА

УИХ-ын 2020 оны 52 дугаар тогтоолоор батлагдсан "АЛСЫН ХАРАА-2050" Монгол Улсын урт хугацааны хөгжлийн бодлогын Зорилт 2.5-ын 1 дүгээр үе шат (2021-2030)-ны 4-т "Хүнсний сүлжээний бүх үе шатанд бүртгэл, чанарын удирдлага, хяналт, баталгаажуулалтын тогтолцоог бэхжүүлнэ.", Зорилт 4.4-ийн 2 үе шат (2021-2030)-ны 3-т "Монгол Улс бүс нутгийн эдийн засаг, худалдааны интеграцад нэгдэж, худалдааг хөнгөвчилнө." гэж тус тус заасан.

Монгол Улсын Их Хурлын 2024 оны 21 дүгээр тогтоолоор батлагдсан Монгол Улсын Засгийн газрын үйл ажиллагааны хөтөлбөрт "Нэг Улс-Нэгдсэн стандарт" хөтөлбөр хэрэгжүүлнэ гэж, Монгол Улсын хууль тогтоомжийг 2024-2028 он хүртэл боловсронгуй болгох үндсэн чиглэлд "Стандартчилал, техникийн зохицуулалт, тохирлын үнэлгээний итгэмжлэлийн тухай хуулийг боловсронгуй болгох" гэж, Монгол Улсын Ерөнхий сайдын 2022 оны 159 дүгээр захирамжид Стандартчилал, тохирлын үнэлгээний эрх зүйн орчныг олон улсын жишигт нийцүүлэх талаар тус тус заасан.

Одоогийн хүчин төгөлдөр мөрдөгдөж буй хууль, тогтоомжид стандартыг сонгон хэрэглэх баримт бичиг гэж заасан нь иргэд, аж ахуйн нэгж болон төрийн хяналт шалгалтын чиг үүрэг хэрэгжүүлэх эрх бүхий байгууллага, албан тушаалтны хооронд үл ойлголцол бий болж тодорхойгүй байдал, ойлголтын зөрүү үүсгэж байна.

Монгол Улсад өнөөгийн байдлаар 6730 стандарт хүчин төгөлдөр байгаа ч тэдгээр стандартыг дагаж мөрдөхгүй байгаагаас шалтгаалан хүн, малын эрүүл мэнд, хүрээлэн буй орчин, нийтийн ашиг сонирхолд сөрөг нөлөөллийг бий болгож, хүний эрүүл, аюулгүй орчинд амьдрах эрх зөрчигдөж байна. Иймд цаашид стандартыг хэлбэрэлтгүй дагаж мөрдөх, нийгэмд уг соёл, хандлагыг хэвшүүлэх зайлшгүй шаардлага тулгараад байна.

Монгол Улсын хөгжлийн баримт бичигт дурдсан стратеги, чиг хандлагад нийцүүлэн улс орон, нийгэм, эдийн засгийн болоод хүн амын аюулгүй байдлыг хангаж, экспортыг нэмэгдүүлж, үндэсний үйлдвэрлэлийг хөгжүүлэхэд стандартчилал, техникийн зохицуулалт, тохирлын үнэлгээ, сорьцын хяналтын бодлогоор дэмжлэг үзүүлэх зорилгоор хуулийн төслийг боловсруулсан.

Хууль тогтоомжийн тухай хуулийн 25 дугаар зүйлд зааснаар хуулийн 50-иас дээш хувьд өөрчлөлт орсон тул шинэчилсэн найруулгын төсөл боловсруулж, үзэл баримтлалыг Монгол Улсын Шадар сайд болон Хууль зүй, дотоод хэргийн сайд хамтран баталсан.

Тус хуулийн төслийг 2022-2024 онд нийслэл, 21 аймгийн иргэд, аж ахуй нэгж, төр захиргааны байгууллага, мэргэжлийн холбоодын дунд 60 гаруй хэлэлцүүлэг зохион байгуулсан.

Мөн 2025 оны 02 дугаар сарын 12-ны өдрийн Монгол Улсын Засгийн газрын хуралдаанаас өгсөн үүрэг, чиглэлийн дагуу 2025 оны 02 дугаар сарын 19-21-ний өдрүүдэд "Стандартын хэрэгжилт ба эрх зүйн орчин" хэлэлцүүлгийг Төрийн ордонд зохион байгуулж, барилга, эрүүл мэнд, хүнс, хүрээлэн буй орчны стандартын

хэрэгжилт, эрх зүйн орчин сэдэвт хэлэлцүүлгийг салбар тус бүрд зохион байгуулж, 1000 гаруй оролцогчийг хамруулж, нэгдсэн хуралдаанаас санал, дүгнэлт гарган хуулийн төсөлд холбогдох саналыг тусгасан. Давхардсан тоогоор нийт 17,250 оролцогчийг хамруулж, саналыг тусгасан болно.

Хуулийн төсөл 8 бүлэг, 36 зүйлтэй ба дараах зохицуулалтыг тусгасан. Үүнд:

- Иргэн, аж ахуйн нэгж, байгууллага стандартчиллын баримт бичгийг сонгон хэрэглэх зохицуулалтыг өөрчилж, стандартыг иргэн, хуулийн этгээд дагаж мөрдөхөөр;

- Хуулийн зорилт, зарчим, нэр томъёог шинэчилж, стандартчилал, тохирлын үнэлгээний байгууллага, түүний тогтолцоо, салбар дундын уялдааг хангах зохицуулалтыг бусад хуульд нийцүүлэн томъёолсон;

- Нийтээр дагаж мөрдөх хэм хэмжээний актаар зохицуулж буй зарим харилцааг хуулийн төсөлд тусгаж, төрийн байгууллагын үйл ажиллагааны болон хяналт шалгалтын чиг үүрэг, энэхүү харилцаанд оролцогчдын эрх, үүргийг шинээр заасан;

- Монгол Улсын хэмжээнд дагаж мөрдөх стандарт, техникийн зохицуулалтыг боловсруулах, хэлэлцүүлэх, батлах үйл явцыг тодорхой болгож олон талын оролцоог нэмэгдүүлэхэд анхаарсан;

- Тохирлын үнэлгээний байгууллагуудыг бодлогоор дэмжих, эрх үүргийг тодорхой болгох, үүрэг хариуцлагыг нэмэгдүүлэхэд чиглэсэн;

- Худалдаан дахь тарифын бус саад тотгорыг арилгах хүрээнд стандарт, тохирлын үнэлгээний үр дүнг харилцан хүлээн зөвшөөрөхөөр зохицуулсан;

- Стандарт, техникийн зохицуулалтыг хэрэгжилтийн хяналтыг холбогдох эрх бүхий улсын байцаагч хэрэгжүүлэх, зах зээл дээрх болон Улсын хилээр орж ирж буй бараа бүтээгдэхүүн тохирлын баталгаатай эсэхэд хяналт тавих чиг үүргийг нарийвчлан тусгасан;

- Стандарт, тохирлын үнэлгээний чиглэлээр мэдээллийн сан бүрдүүлж ашиглах, тохирлын баталгаатайгаар улсын хилээр нэвтрүүлсэн бараа, бүтээгдэхүүний мэдээллийг төрийн байгууллага хооронд мэдээллийн сан үүсгэж ашиглах зохицуулалтыг шинээр нэмсэн;

- Чанар, стандартын шаардлага хангасан бүтээгдэхүүнийг зах зээлд нийлүүлэхэд иргэн, хуулийн этгээдийн эрх үүргийг тодорхой зааж, стандартын хэрэгжилтэд зөвхөн төрөөс хяналт тавих бус иргэн, үйлдвэрлэгч, нийлүүлэгч бүх талын оролцоог хангахаар зохицуулсан;

- Сорьцын хяналт шалгалтыг хэрэгжүүлэх, төрийн хяналт шалгалтын үр нөлөөг дээшлүүлэх, хувийн хэвшлийн үйл ажиллагааг дэмжих зэрэг олон талт хамтын ажиллагааны зохицуулалтыг тусгасан.

Хуулийн төслийг дагалдуулан "Автотээврийн тухай хуульд өөрчлөлт оруулах тухай", "Байгаль орчныг хамгаалах тухай хуульд өөрчлөлт оруулах тухай", "Баяжуулсан хүнсний тухай хуульд өөрчлөлт оруулах тухай", "Гэр бүлийн хүчирхийлэлтэй тэмцэх тухай хуульд өөрчлөлт оруулах тухай", "Монгол хэлний тухай хуульд өөрчлөлт оруулах тухай" "Стандартчилал, техникийн зохицуулалт, тохирлын үнэлгээний итгэмжлэлийн тухай хуулийг дагаж мөрдөх журмын тухай", "Тамхины хяналтын тухай хуульд өөрчлөлт оруулах тухай", "Хот, суурины ус хангамж, ариутгах татуургын ашиглалтын тухай хуульд өөрчлөлт оруулах тухай", "Хууль хүчингүй болсонд тооцох тухай", "Хүнсний бүтээгдэхүүний аюулгүй байдлыг

хангах тухай хуульд өөрчлөлт оруулах тухай хуулийн төслийг тус тус боловсруулсан болно.

Хуулийн төсөл батлагдсанаар стандартыг хэрэглэх, хэрэгжүүлэх тогтолцоо боловсронгуй болж, олон улсын нийтлэг жишигт нийцсэнээр дотоодын бүтээгдэхүүн, үйлчилгээний чанар, стандартыг олон улсад зөвшөөрөх, гадаад худалдаа, экспортыг хөнгөвчлөх нөхцөл сайжирна. Түүнчлэн стандартын хэрэгжилт хангагдаж, хүн амын эрүүл, аюулгүй орчинд амьдрах эрх хангагдана.

---oOo---

СТАНДАРТЧИЛАЛ, ТЕХНИКИЙН ЗОХИЦУУЛАЛТ, ТОХИРЛЫН ҮНЭЛГЭЭНИЙ ИТГЭМЖЛЭЛИЙН ТУХАЙ ХУУЛИЙН ШИНЭЧИЛСЭН НАЙРУУЛГЫН ТӨСЛИЙН ДЭЛГЭРЭНГҮЙ ТАНИЛЦУУЛГА

Монгол Улсын хууль тогтоомжийг 2024-2028 он хүртэл боловсронгуй болгох үндсэн чиглэлд “Стандартчилал, техникийн зохицуулалт, тохирлын үнэлгээний итгэмжлэлийн тухай хуулийг боловсронгуй болгох” гэж, Монгол Улсын Ерөнхий сайдын 2022 оны 10 дугаар 07-ны өдрийн 159 дүгээр захирамжид Стандартчилал, тохирлын үнэлгээний эрх зүйн орчныг олон улсын жишигт нийцүүлэх талаар, Монгол Улсын Их Хурлын 2024 оны 21 дүгээр тогтоолоор батлагдсан Монгол Улсын Засгийн газрын үйл ажиллагааны хөтөлбөрт нийт 33 салбар, үйл ажиллагаанд шинэ стандарт нэвтрүүлэхээр тус тус заасан.

УИХ-ын 2020 оны 52 дугаар тогтоолоор батлагдсан “АЛСЫН ХАРАА-2050” Монгол Улсын урт хугацааны хөгжлийн бодлогын Зорилт 2.5-ын 1 дүгээр үе шат (2021-2030)-ны 4-т “Хүнсний сүлжээний бүх үе шатанд бүртгэл, чанарын удирдлага, хяналт, баталгаажуулалтын тогтолцоог бэхжүүлнэ.”, Зорилт 4.4-ийн 2 үе шат (2021-2030)-ны 3-т “Монгол Улс бүс нутгийн эдийн засаг, худалдааны интеграцад нэгдэж, худалдааг хөнгөвчилнэ.” гэж тус тус заасан.

Монгол Улсын Их Хурлын 2024 оны 21 дүгээр тогтоолоор батлагдсан Монгол Улсын Засгийн газрын 2024-2028 оны үйл ажиллагааны хөтөлбөрт “Нэг Улс-Нэгдсэн стандарт” хөтөлбөр хэрэгжүүлнэ гэж, мөн 33 салбар, үйл ажиллагаанд шинээр стандарт нэвтрүүлэхээр заасан.

Монгол Улсад өнөөгийн байдлаар 2017 онд батлагдсан Стандартчилал, техникийн зохицуулалт, тохирлын үнэлгээний итгэмжлэлийн тухай хууль, тухайн салбарт стандартыг батлан хэрэгжүүлэхээр заасан 71 хууль, нийт 6733 стандарт хэрэгжиж байгаа ч түүнийг иргэн, хуулийн этгээд дагаж мөрдөхгүй байгаагаас шалтгаалан хүн, амын эрүүл мэнд, хүрээлэн буй орчин, бүтээгдэхүүний аюулгүй байдал алдагдаж, эрүүл, аюулгүй орчинд амьдрах эрх зөрчигдөж байна.

Монгол Улсын Шадар сайдын тушаалаар 2022 онд барилга, эрүүл мэнд, хүнс, аялал жуулчлалын салбарын 2000 гаруй стандартад үзлэг хийж олон улсын жишигт нийцсэн эсэхийг судлахад 782 стандартыг хэвээр, 159 стандартыг хүчингүй болгох, 1067 стандартыг олон улс, бүс нутгийн жишигт нийцүүлэн шинэчлэх шаардлагатай гэсэн дүгнэлт гарсан.

Дүгнэлт гарснаас хойш 3 жилийн хугацаа өнгөрөхөд 204 стандарт буюу үзлэгт хамрагдсан стандартын өөрчилбөл зохих нийт стандартын 20 хүрэхгүй хувийг шинэчлэн баталж, үлдсэн 80 орчим хувийг шинэчлээгүй өнөөдрийг хүрчээ. Энэ нь эрүүл мэнд, барилга, хүнс, аялал жуулчлалын салбар дэлхийн хөгжил дэвшил, технологи, инновацаас хоцорч, дэлхийн худалдааны байгууллагын өмнө хүлээсэн үүргээ биелүүлэх, худалдаан дахь саад тотгорыг арилгахад сөргөөр нөлөөлж байна.

Тохирлын үнэлгээний итгэмжлэлд хүний эрүүл мэнд, хүрээлэн буй орчинд шууд нөлөөлөхүйц бараа бүтээгдэхүүн, ажил үйлчилгээ хамрагдахгүй байгаа нь нийгмийн эрүүл мэндийн эрсдэлийг нэмэгдүүлж байна. Тухайлбал, эрүүл мэндийн чиглэлийн төр, хувийн хэвшлийн 400 орчим лаборатори үйл ажиллагаа явуулж байгаагаас 35 лаборатори стандартын үзүүлэлт шаардлагыг хангаж итгэмжлэгдсэн байна.

Мөн хүнсний чиглэлийн төр, хувийн хэвшлийн 114 лаборатори үйл ажиллагаа явуулж байгаагаас 35 хувь нь итгэмжлэгдээгүй, худалдаалагдаж буй хүнсний түүхий эд, бүтээгдэхүүний чанар, аюулгүй байдлыг (эмийн болон пестицидийн үлдэгдэл, микотоксин, хүнд металл болон бусад бохирдуулагчид) бүрэн шинжилж чадахгүй байгаа нь хүнсний аюулгүй байдал алдагдах түвшинд хүрч, хүнсээр дамжих өвчлөлийн тохиолдлын тоо ихсэж улмаар хүн амын эрүүл мэндэд сөргөөр нөлөөлөх болсныг харуулж байна.

Стандартын хэрэгжилтийг мөрдүүлэх, хянах тогтолцооны нэг хэсэг нь лаборатори боловч өнөөгийн байдлаар үндэсний хэмжээнд үйл ажиллагаа явуулж байгаа сорилтын лабораториудын барилга, байгууламж, хүчин чадал, тоног төхөөрөмж, урвалж бодисын хангалт, хүний нөөцийн чадавх муу байгаагаас бүх салбарын лабораторийн бодлого, тогтолцоо алдагдаж, стандартын хэрэгжилтийг хангах, хянах боломжгүйд хүрчээ.

Монгол Улсад анх Стандартчилал, чанарын баталгаажуулалтын тухай хуулийг 1994 онд, Стандартчилал, тохирлын үнэлгээний хууль 2003 онд, Стандартчилал, техникийн зохицуулалт, тохирлын үнэлгээний итгэмжлэлийн тухай хуулийг 2017 онд УИХ-аас тус тус баталжээ.

Монгол Улсын Ерөнхий сайдын 2022 оны 159 дүгээр захирамжийн хүрээнд Монгол Улсын Шадар сайдын 2022 оны 10 сарын 26-ны өдрийн 80 дугаар тушаалаар стандартчиллын эрх зүйн орчныг шинэчлэх чиг үүрэг бүхий Ажлын дэд хэсэг байгуулагдсан.

Тус Ажлын дэд хэсгээс нийслэл, 21 аймгийн иргэд, аж ахуй нэгж, төр захиргааны байгууллага, мэргэжлийн холбоодыг оролцуулан зохион байгуулсан 60 гаруй хэлэлцүүлгийн үр дүн болон хүчин төгөлдөр үйлчилж байгаа Стандартчилал, техникийн зохицуулалт, тохирлын үнэлгээний итгэмжлэлийн тухай хуулийн хэрэгжилтийн үр нөлөөний үнэлгээний дүгнэлтээр энэ хуулийг шинэчлэх зайлшгүй шаардлагатай гэж үзсэн.

Дээрх асуудлыг шийдвэрлэх зорилгоор Стандартчилал, техникийн зохицуулалт, тохирлын үнэлгээний итгэмжлэлийн тухай хуулийн шинэчилсэн найруулгын төслийг 2022 оноос хойш боловсруулж холбогдох яамдаас 2 удаа албан ёсоор санал авч, Үндэсний хэмжээнд нэгдсэн хэлэлцүүлэг 3 удаа, салбарын хэмжээнд 60 удаа зохион байгуулж, давхардсан тоогоор нийт 17,000 мянга гаруй оролцогчийг хамруулж, саналыг тусгасан.

Цаашид стандартыг дагаж мөрдөх эрх зүйн зохицуулалтыг бий болгох замаар стандартыг хэрэгжүүлдэг соёл хандлагыг төлөвшүүлэх, үндэсний хяналт, зохицуулалтын тогтолцоог бий болгох шаардлагатай гэж Ажлын хэсэг, мэргэжлийн оролцогчид, эрдэмтэн судлаачид дүгнэсэн.

Хууль тогтоомжийн тухай хуулийн 25 дугаар зүйлд зааснаар хуулийн 50-иас дээш хувьд өөрчлөлт орсон тул шинэчилсэн найруулгын төсөл боловсруулж, үзэл баримтлалыг Монгол Улсын Шадар сайд болон Хууль зүй, дотоод хэргийн сайд хамтран баталсан.

Энэхүү хуулийн төслийн үр нөлөөний үнэлгээгээр стандартын хөгжлийн сан, стандартын байгууллагын ажилтны нийгмийн баталгаа зэрэг нь бусад хууль тогтоомжтой давхардаж байх, зарим харилцаа буюу итгэмжлэлийн үйл ажиллагаа, шинжээчийн үйл ажиллагаа нь тусгай зөвшөөрөлд хамаарах Зөвшөөрлийн тухай

хуулиар зохицуулах шаардлагатай харилцаа гэж дүгнэснийг Ажлын хэсэг тус тус хэлэлцэн ихэнх саналыг хүлээн авч хуулийн төслийг ахин сайжруулсан болно. Ингэхдээ оролцогч талуудын эрх үүргийг тодорхой болгох замаар стандартын хэрэгжилтийг хангуулахад онцгой анхаарсан.

Хуулийн төсөл 8 бүлэг, 36 зүйлтэй ба иргэн, аж ахуйн нэгж, байгууллага стандартчиллын баримт бичгийг сонгон хэрэглэх зохицуулалтыг өөрчилж, стандартыг иргэн, хуулийн этгээд дагаж мөрдөхөөр заасан. Стандартаар дамжуулан салбарын үйл ажиллагаанд хяналт тавих тогтолцоог бий болгоход хуулийн төслийн гол үзэл баримтлал чиглэж байна.

Стандарт, техникийн зохицуулалтыг дагаж мөрдөх, бүтээгдэхүүн, үйлчилгээг баталгаажуулалтад хамруулах, худалдаан дахь тарифын бус саад тотгорыг арилгах хэм хэмжээ бүхий хуулийн төслийг хэлэлцэн батлагдсанаар стандартчилал, тохирлын үнэлгээний байгууллага, түүний хяналт зохицуулалтын тогтолцоо бүрдэж, салбар дундын уялдаа хангагдаж, иргэд, олон нийтийн оролцоо нэмэгдэнэ.

Түүнчлэн олон улсын болон бүс нутгийн стандартыг хүлээн зөвшөөрөх, хэрэглэх, нутагшуулж, стандартыг хэрэгжүүлэх хяналт, зохицуулалтын тогтолцоо боловсронгуй болсноор дотоодын бүтээгдэхүүн, үйлчилгээний чанар, стандарт олон улсад зөвшөөрөгдөж, гадаад худалдаа, экспортыг хөнгөвчлөх нөхцөл сайжирна гэж үзэж байна.

Энэ хуулийн төсөл батлагдсанаар экспорт, импортын барааг тохирлын үнэлгээний байгууллагын тохирлын гэрчилгээ, нотолгоонд үндэслэх байдал дээшилнэ, улмаар тохирлын баталгаатай бараа, бүтээгдэхүүнийг үйлдвэрлэх нөхцөл хангагдан, дотоодын бүтээгдэхүүн олон улсын зах зээлд өрсөлдөх чадвар нэмэгдэнэ гэж тооцоолж байна.

Дэлхийн улс орнууд стандартын цахимжуулалт, дижитал шилжилтийн дараагийн асуудал хиймэл оюун ухаан руу шилжиж цаг үе биднийг хөл нийлүүлэн алхахыг шаардаж байна. Стандарт, хэмжил зүйн салбар сүүлийн нэг жилийн хугацаанд 26 ажил үйлчилгээг цахимжуулсан бөгөөд цахимжилт, мэдээллийн сангийн эрх зүйн зохицуулалтыг мөн хуулийн төсөлд тусгасан.

Стандарт, тохирлын үнэлгээний салбарт цахимжуулалт, мэдээллийн санг нэвтрүүлснээр энэхүү үйл ажиллагаанд оролцогчид мэдээллийн санд мэдээлэл оруулах, мэдээллийг харилцан ашиглах байдлыг нэмэгдүүлж, хил, гааль, төрийн хяналт шалгалтын салбарт мэдээллийн санд үндэслэсэн хяналтын тогтолцоог бүрдүүлэхээр зорьж байна.

Монгол Улс нь стандарт, тохирлын үнэлгээ, итгэмжлэлийн үйл ажиллагааг цахимжуулснаар хил гаалийн мэдээлэл, стандартын шаардлага хангасан бараа, бүтээгдэхүүнийг хилийн хорио цээрийн хяналттай нэвтрүүлэх, төрийн үйлчилгээ хялбарших, улмаар авлигын эрсдэлийг бууруулах боломж бүрдэх юм.

Цаашид стандарт, тохирлын үнэлгээ, итгэмжлэлийн үйл ажиллагаагаар дамжуулан салбар, салбарын шилдэг технологи, инновацийн шинэчлэлтийг нэвтрүүлж, хяналт зохицуулалтын тогтолцоог сайжруулж, иргэдийн эрүүл мэнд, амь нас, аюулгүй байдлыг хангах, учирч болзошгүй эрсдэлээс сэргийлэх, гадаад, дотоод худалдааны эргэлтийг сайжруулж эдийн засгийн үр өгөөжийг нэмэгдүүлэхэд голлох хувь нэмрийг оруулах учиртай.

Стандартчилал, техникийн зохицуулалт, тохирлын үнэлгээний итгэмжлэлийн тухай хуулийн шинэчилсэн найруулгын төсөлд дараах гол зохицуулалтыг тусгасан болно. Үүнд:

- Иргэн, аж ахуйн нэгж, байгууллага стандартчиллын баримт бичгийг сонгон хэрэглэх зохицуулалтыг өөрчилж, стандартыг иргэн, хуулийн этгээд дагаж мөрдөхөөр;

- Хуулийн зорилт, зарчим, нэр томъёог шинэчилж, стандартчилал, тохирлын үнэлгээний байгууллага, түүний тогтолцоо, салбар дундын уялдааг хангах зохицуулалтыг бусад хуульд нийцүүлэн томъёолсон;

- Нийтээр дагаж мөрдөх хэм хэмжээний актаар зохицуулж буй зарим харилцааг хуулийн төсөлд тусгаж, төрийн байгууллагын үйл ажиллагааны болон хяналт шалгалтын чиг үүрэг, энэхүү харилцаанд оролцогчдын эрх, үүргийг шинээр заасан;

- Монгол Улсын хэмжээнд дагаж мөрдөх стандарт, техникийн зохицуулалтыг боловсруулах, хэлэлцүүлэх, батлах үйл явцыг тодорхой болгож олон талын оролцоог нэмэгдүүлэхэд анхаарсан;

- Стандартын хэрэгжилтийг тодорхой хугацаанд үнэлж дүгнэх, стандартын баримт бичигт давтамжтай үзлэг хийх цаг үеийн хэрэгцээ шаардлагад нийцүүлэн шинэчилж, сайжруулах талаар зохицуулсан;

- Тохирлын үнэлгээний байгууллагуудыг бодлогоор дэмжих, эрх үүргийг тодорхой болгох, үүрэг хариуцлагыг нэмэгдүүлэх, төрийн хяналт шалгалтын үйл ажиллагаанд тохирлын үнэлгээний үр дүнг ашиглах, хүлээн зөвшөөрөхөд чиглэсэн;

- Худалдаан дахь тарифын бус саад тотгорыг арилгах хүрээнд стандарт, тохирлын үнэлгээний үр дүнг харилцан хүлээн зөвшөөрөхөөр зохицуулсан;

- Стандарт, техникийн зохицуулалтыг хэрэгжилтийн хяналтыг холбогдох эрх бүхий улсын байцаагч хэрэгжүүлэх, зах зээл дээрх болон Улсын хилээр орж ирж буй бараа бүтээгдэхүүн тохирлын баталгаатай эсэхэд хяналт тавих чиг үүргийг нарийвчлан тусгасан;

- Стандарт, тохирлын үнэлгээний чиглэлээр мэдээллийн сан бүрдүүлж ашиглах, тохирлын баталгаатайгаар улсын хилээр нэвтрүүлсэн бараа, бүтээгдэхүүний мэдээллийг төрийн байгууллага хооронд мэдээллийн сан үүсгэж ашиглах зохицуулалтыг шинээр нэмсэн;

- Чанар, стандартын шаардлага хангасан бүтээгдэхүүнийг зах зээлд нийлүүлэхэд иргэн, хуулийн этгээдийн эрх үүргийг тодорхой зааж, стандартын хэрэгжилтэд зөвхөн төрөөс хяналт тавих бус иргэн, үйлдвэрлэгч, нийлүүлэгч бүх талын оролцоог хангахаар зохицуулсан;

- Сорьцын хяналт шалгалтыг хэрэгжүүлэх зохицуулалтыг тусгаж, төрийн хяналт шалгалтын үр нөлөөг дээшлүүлэх, хувийн хэвшлийн үйл ажиллагааг дэмжих зэрэг олон талт хамтын ажиллагааны зохицуулалтыг тусгасан;

- Стандартын байгууллагын орон нутгийн нэгжийн чиг үүргийг нэмэгдүүлж, төвлөрлийг сааруулах бодлогыг хэрэгжүүлэх эрх зүйн зохицуулалтыг тусгасан;

Хуулийн төслийг дагалдуулан “Автотээврийн тухай хуульд өөрчлөлт оруулах тухай”, “Байгаль орчныг хамгаалах тухай хуульд өөрчлөлт оруулах тухай”, “Баяжуулсан хүнсний тухай хуульд өөрчлөлт оруулах тухай”, “Гэр бүлийн хүчирхийлэлтэй тэмцэх тухай хуульд өөрчлөлт оруулах тухай”, “Монгол хэлний тухай хуульд өөрчлөлт оруулах

тухай” “Стандартчилал, техникийн зохицуулалт, тохирлын үнэлгээний итгэмжлэлийн тухай хуулийг дагаж мөрдөх журмын тухай”, “Тамхины хяналтын тухай хуульд өөрчлөлт оруулах тухай”, “Хот, суурины ус хангамж, ариутгах татуургын ашиглалтын тухай хуульд өөрчлөлт оруулах тухай”, “Хууль хүчингүй болсонд тооцох тухай”, “Хүнсний бүтээгдэхүүний аюулгүй байдлыг хангах тухай хуульд өөрчлөлт оруулах тухай хуулийн төслийг тус тус боловсруулсан болно.

Хуулийн төсөл батлагдсанаар стандартыг хэрэглэх, хэрэгжүүлэх тогтолцоо боловсронгуй болж, олон улсын нийтлэг жишигт нийцсэнээр дотоодын бүтээгдэхүүн, үйлчилгээний чанар, стандартыг олон улсад зөвшөөрөх, гадаад худалдаа, экспортыг хөнгөвчлөх нөхцөл сайжирна. Түүнчлэн стандартын хэрэгжилт хангагдаж, хүн амын эрүүл, аюулгүй орчинд амьдрах эрх хангагдана.

---oOo---